

Realisasi kenderaan nasional ketiga, automotif jadi pemacu Malaysia - Tun Mahathir
Astro Awani
18 November 2018
Harits Asyraf Hasnan,

PORT MORESBY: Tun Dr Mahathir Mohamad kekal dengan pendirian beliau untuk melaksanakan projek kenderaan nasional ketiga.

Perdana Menteri menegaskan, industri automotif merupakan pemacu kepada sektor yang lain terutama kejuruteraan.

“Jika anda ingin belajar pembuatan sesuatu produk, terutama melibatkan kejuruteraan, ia perlu bermula daripada kereta.

“Seringkali saya katakan, jika ingin membuat kereta, anda perlu buat 4,000 komponen berlainan dan disatukan semuanya. Ia tidak mudah.

“Tapi kita telah mahir berkenaan perkara tersebut dalam masa yang singkat. Kini kita boleh reka dan cipta prototaip. Malah, kita juga boleh cipta enjin,” katanya pada sidang media bersama media Malaysia seiring Mesyuarat Pemimpin-pemimpin Ekonomi APEC (AELM) Ke-26 di sini pada Sabtu.

Beliau berkata demikian sebagai mengulas pandangan beliau menerusi ucapan pada Sidang Kemuncak CEO APEC yang menyentuh cabaran ledakan teknologi kepada negara rantau Asia Pasifik.

Tambah Dr Mahathir, sekiranya tiada projek automotif dibangunkan, beliau meragui bahawa Malaysia mampu untuk mahir dalam cabaran teknologi melibatkan reka bentuk.

“Buat kereta juga memerlukan teknologi baharu. Ini kerana, bila reka kereta, anda tidak lagi mereka di atas kertas.

“Kita guna teknologi untuk mereka bentuk dalam, luaran, setiap sudut serta menggabungkannya sebelum ia dihasilkan. Itulah teknologi,” katanya lagi.

2018Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/realisasi-kenderaan-nasional-ketiga-automotif-jadi-pemacu-malaysia-tun-mahathir-191424>